

摛藻堂四庫全書薈要

集部

欽定四庫全書叢要

集部

道園學古錄卷四十七



詳校官助教臣謝登雋

欽定四庫全書舊要卷一萬六千三百七十四

集部

道園學古錄卷四十七

方外藁三

元 虞集 撰

新修開元浴室院記

袁州開元浴室院者故唐寺也宋時僧善相主院有回
道人者愛其井泉甘美時來從相飲久之留墨二丸與
相而去湖南轉運李甲好參訪或語之曰呂洞賓在袁

州浴室院有墨寄其主僧可徵也李道過求之相相曰
有回道人寄墨無呂洞賓也出以與李益黃金云明日
回至謂相曰人知我矣遂與俱去不知所終自是院無
居人荷塘山僧間來視之不能葺也獨謚嚴愿居之久
廢弟子曰法琳法琳自幼參學承事雪巖欽禪師與入
室之列孤舟濟在崇勝海印如在慧力虛谷陵在仰山
皆嘗禮之使分坐說法皇慶初元持鉢遊旁郡頗以藥
石濟人歸而傾其囊得金若干遂以葺其院建大屋曰

毗盧法界象佛菩薩天人龍神其中曰華嚴海會端其
徑遂高其門閨又有撫州判官李某鑄銅為浮屠紹興
鹽司丞周立禮買田施之而琳來京師求文以為記予
嘗聞佛者之言曰呂洞賓仙久既去後見黃龍超慧禪
師始究竟今又與俱隱去相為人不可知要是可與呂
俱亦異人矣然則夫所謂非幻不滅者果有二事哉二
人者遊戲示現將無為人之深心然而卒莫能繼之寥
寥寥落百餘年而有待於琳者何也琳遇大司空

缺

於燕之仰山山本廬陵人其傳法遠祖曰青山辨山谷
黃氏之孫本豫章人皆江西也故仰山為琳開堂集衆
傳衣拂付之俾嗣其法焉由是王邸戚畹貴臣之家多
知琳者名聞天子被璽書住持撫州梅山廣濟禪寺大
司徒珍且爾請于帝師加其號曰佛慈普濟妙慧禪師
而別出書護其院者則僉宣政院事鄂勒哲依達實之請
也故為述偈以贊曰大乘浴室表清靜光明成就福德
聚神王持地不動身寧隨世相有毀廢外道仙人與尊

者二俱自了去不返草深井泥古道斷百歲來者墮空寂琳公歷事諸古佛慈愍因地不思議歸運已珍若塵沙成此毗盧妙法界儼然宮殿彈指頃華嚴境界種種現集雲老人破顏笑印爾願力堅定故永劫不壞常現前續佛慧命度衆生回向當代殊勝常

相山重修保安觀記

撫州崇仁之南六十里有高厚博大之山焉曰巴山唐名臨川山今曰相山者也循其麓三百里有餘不能周

升其巔廿餘里而後至此而上銳自郡城南出已望見之邑之官舍民居當陽者莫不面對雲如縷出山中盤礴覆冒膏潤充溢衣被草木阨谷之容溝澗之通堰埭之瀦節宣蓄泄以為稼穡之備其利無窮矣是故吏民朝夕瞻仰一食必祝設不幸有旱溢妖沴之變土木螟蝗之孽無小大遠邇奔告稽首得所願欲乃已巍乎高哉穹窿巔峯之在望也其神明焉可誣哉而邑之父老言先漢時地本南昌西南之境梅君福尉南昌有所捕

治至焉欒君巴為豫章太守亦有所勸治於此二君有
仙道方術以輔其政化辟除邪暴禁止淫黷使民不逢
不若離其菑害是以德之而不忘皆有遺跡祠宇在山
之支隴唐鄧君紫陽本郡人葉君法善縉雲人亦曰南
城人皆常往來修真山中故宋時即山巔並祠此四君
者而使道士守之梅欒山下之祀祭不廢乞靈之人以
四君為歸矣紹興中郡守歷陽張公孝祥嘗刻石著其
靈應而石亡久矣其文亦僅傳開慶己未用漕臣守臣

言禱祈之應封四君為真人端平甲午加封真君皆有
褒稱咸淳辛未守臣四明黃公震端嚴有識士也至郡
連旱大究荒政斥罷淫祀獨禱於社稷山川就郡城望
拜茲山遣吏迎四君之象果得雨歲乃熟去為祥刑使
者猶屬文道其事刻石山中俾後來者知敬恭明神而
不陷昵于邪淫云內附國朝仍用道士主祠天子有詔
書祀名山大川則守令奉詔敬祠歲侵守令迎禱如故
事民間之禱祠無所禁也然山高以險祈報嘗在夏秋

時冬來寒山氣已凝為冰雪守者非清苦不能恒居四方冠褐者夤緣文書汚合苟瓜華之微利人迹罕至則鳥鼠散祠宇頽圯像設暴露農民顧瞻傷怛不知所出今監邑承直郎托雲_色爾童大用嘗奉詔書致祭見而感焉未暇及也在官之明年為後至元庚辰四月旱種不入土禱於山麓鑾君之祠其應滂沛甚異七月又旱合群祀而禱之亟迎四君之象皆至縣治又得雨郡吏以旱之迎禱四君者雨亦應而送神還山目其荒涼以懼

以愧究諸其故則主祠者無固志之敝也邑中景雲觀
道士黃處和事玄教大宗師吳公於京師吳公命處和
歸主華蓋之山而正一三十九代張天師已令王應真
主華蓋得度弟子以居既有成績乃移處和理相山苦
四至者爭利而弗卹也巴圖君乃為文書言諸主道教
者請以處和自度弟子嗣守而葺之未數月張天師吳
大宗師還書悉如巴圖之請相山先有上清法師孫慶
衍受璽書領相山而留侍上方不能至處和遂次慶衍

為相山甲乙之始云巴圖告諸近山之士民曰姓某者各出財以施黃處和耕石田飯疏食披榛刲木躬先徒工遂以至正辛巳歲九月克修四仙之祠道衆之舍門廡庖庫以次而舉監邑通敏有才器治事有方略久而民益信服之是以作茲山也不煩勞而迨其成焉山之人不敢昧其更始乃相與伐石而篆其事云額森之同官前令奉訓大夫新知寧都州益都丁額森今令承務郎鄆城任果前丞忠顯校尉同知寧都州縉山張榮令

丞從仕郎某郡張友諒始終共任其事者將仕佐郎主
簿豫章舒文琰今尉楚國程世臣典史豫章胡天祥代
胡者汴梁石成玉也至正元年歲辛巳十有一月朔旦
具官虞集記

碑

勅賜黃梅重建五祖禪師寺碑

禪宗第五代祖師諱弘忍生蘄州黃梅即黃梅為道場
說法度人傳信之衣既有所付遂去縣二十里入馮茂

山以居及歿弟子奉全身塔焉學人依歸聚為大刹唐
人尊之曰大滿禪師塔曰法雨寺曰大中東山之寺南
唐加師號曰廣化宋景德中改賜寺額真惠其初律師
居之祥符八年戒禪師來住山始革為禪歷住者十二
人演禪師來而東山祖庭益重宋之季年國境日蹙蘄
以邊障受兵州吏民奉師遺體入城求福州果以靈貺
按堵不遘鋒鏑而東山見燬于兵既內附日以安輯富
庶僧了行乃躬事土木崇精舍于州治之東以奉香火

之留者又入東山汎掃寺之故基而致工焉塔廟庭宇
粗立而行老至元二十九年僧大通繼之成佛祖殿僧
堂方丈鐘樓之屬頗稱華麗皇慶二年三韓萬奇上人
從藩王奏請還祖東山事具義公記至治二年通又老
今住持法式方為虎溪第一坐通率衆具禮請主其山
是時寺之食者衆積弊紛拏稱貸以給式至精勵自持
大作三門黃金節題榜作大殿奉祖師作經閣藏殿而
蒙堂安老堂行堂庫堂萬佛閣照堂庖湧垣廡次第皆

成而通公前所作多庳下不稱且以弊告又撒而更新
之務極崇勝給衆之田有鳳源永福東積復古阮家鉄
甕等庄或復或創凡二百餘頃其屋室器用之資又日
完以富鐘鼓鏗訇禪侶雲至式致用而有文又修百丈
舊規而行之江漢之間隱然一大闕闇計其經始至于
落成才七年爾何其敏哉施財者自郡帥韓某總管易
某等凡若干等人其成者則大觀惠孚希復也式又曰
今國家崇尚象教古昔莫能加今東山之成願力所就

蓋山川之靈實際景運而祖師名號非盛代所命不其
闕乎乃走京師將請諸朝中政院使李公信家本三韓
有上人曰覺元日智承運以其事語之李公信與其妻
隴國夫人崔氏並加敬慕檀施必親又齋沐聞於中宮
製金紋伽黎大衣以賜出宮中金錢萬緡與之俾半修
塔廟半為長明燈之資而式亦賜金衣受璽書號曰佛
日普照大禪師四祖信大師真身同在蘄同奉入城又
同時各歸故山故亦同有伽黎然燈之賜焉缺年

缺月缺日三藏法師具以奏聞天子乃賜四祖號曰妙智正覺禪師五祖號曰妙圓普覺禪師而詔翰林直學士臣某為文記之勒諸東山之石臣某嘗問諸佛學之人曰釋迦二十八傳為達摩入中國為初祖祖祖相承至忍大師而秀與能分南北宗南宗既為六祖弟子尤盛可知者十餘人而澤會南岳讓青原思最顯思之後分雲門洞山法眼三宗會之後圭峯密推會為第七祖而於南岳之傳頗議其任心即修為未盡然密不一二

傳遂不著於世而讓之後為滻仰為臨濟數百年來衍
迤盛大多濟子孫它宗莫及也東山之為禪也寔始戒
戒雲門之系也實盛于演演濟之六傳嫡孫演在山時
從者常千人而佛果勤佛眼遠佛鑑勤南堂靜開祖寧
五祖自皆得法於此此六人者出其法益張以大而勤
之後若隆若果皆振世卓然之豪傑其所警發又多大
人君子而東南之言禪者大抵多其後人矣不亦盛乎
嗚呼自忍師發迹茲山而戒演中興之於五百年間殆

法運也不然心宗無門之說不絕如縫疑似幾微之失
將何所底止而折衷哉茲寺之記所以不可不重也況
式以五十年未就之規七載畢事天將啟其人如式演
者於是乎在故為之銘曰

巍巍東山大士宅蒼松歷見歲七百藏真寶局面不隔
精妙稟具至陽德真實不壞過金石流光屬天夕芒白
有睹其睞朝日赫承運出見保邑國來歸有時用無迹
素華淨於冰雪色沉沉天宮萬寶積上當星漢下連澤

九江匡廬在几席鬼神與能龍獻力諸天駿奔從帝釋
豎草立刹成勿亟誰其作者行通式臣某著銘帝所錫
咨爾法界衆神伯持地上林各述職祖號具足如帝勅
輔我皇元鎮無極

大興龍普明禪寺碑

天歷元年九月庚辰皇帝遣工部尚書臣士弘傳詔翰
林命臣某製大興龍普明禪寺碑文皇帝若曰昔我皇
考武宗皇帝撫軍朔方朕生之三年歸繼大統在位四

年而棄群臣仁廟臨御傳至英皇當是時權姦用事
譖離間宗親近屬幾無所容海南之為地也炎霧噴毒
往鮮生還而使朕居焉閱歷歲年有安無苦朕於是覃
思以求豈非上天垂祐祖宗鴻慈而致然歟乃捐金兀
工即瓊陽之勝地建釋氏之精藍以畜天地祖宗之昭
貺以介福于皇帝太皇太后又以綏保其民人焉創始
于至治元年十月六日締構雄麗嶺海之間鬱為奇觀
朕雖未嘗躬落其成而想見其處常往來于像也臨御

之始既念疇昔因賜名曰大興龍普明禪寺其紀朕意
託諸金石俾示悠久臣某拜手稽首颺言曰昔者大舜
歷試諸難殷王高宗舊勞于外蓋雖聖賢之資猶必困
心衡慮而後膺天之大任而成帝王之能事也今陛下
躬冒瘴癘備嘗險阻則其所以下悉民情上成聖德者
夫豈一日之積哉且夫傾挫流離之餘人之常情豈暇
他顧而陛下於斯時也曾不以動其心顧方拳拳君親
之思閔閔黎庶之苦不惜萬金建大佛事以致其誠鳴

呼君天下之量固已見於此矣不亦盛乎且臣聞之天之所以照臨萬國者日月之明也茲於淵潛之所錫興龍之美名俾普天之下咸仰觀其隆平之効炳煥赫奕以至於萬億年而無窮又豈溟渤之外獨可得而私敢述銘而刻之銘曰

於惟聖皇受命自天本固支分正緒有傳天相峻德櫛沐風露以恬以廉貞幹之固旆旆龍旂來歸孔時臣力師武至公何私肅肅清宮夙夜篠戴而猶固讓至三至

再赫乎當陽思舊不忘曰我梵祠在彼海邦昔瞻廟朝
莫獲近只親矚下氓顛崖病只言依佛乘自我祖宗曷
既予懷於焉作宮惟天祖宗錫我景貺茲不表章闕彼
顯望乃錫嘉名如日之升文臣受詔刻石以徵咨爾島
嶼龍君海伯波瀾不驚各率厥職鏗訇鼓鐘來儀來朝
內嚮而趨天子匪遙嗟嗟遠人天子念爾念爾艱食饑
征用弛天子無為一日萬幾孰不勞心而爾是思爾有
羞老爾有婦子均感殊眷何間伊邇蔚蔚斯文金石相

宣謳歌欣愉於萬斯年

成都路正一宮碑

蜀之山川高厚而深遠故其生物也特異文武材能豪傑之士世世不乏然猶不足盡其神氣之秘緼於是有一神人仙者青圖赤斧之流出乎其間而世所共知者漢正一天師張陵遺跡幾徧西南事最著其興利若鹽井之屬至于今賴之其後者朱桃椎王祿和等尤不可勝數最近者且百年有法師劉浩然碧雲庵道士張全者高

行奇術近接耳目里中兒女子能道之故成都青陽玉
局諸宮燦然以名天下者非一日矣延祐三年春予在
奉常被旨修歲祀于江瀆禮成且還思昔之所聞而問
焉凡宮室樓殿蒼乎其幽黝乎其潛萃乎魄乎其雄傑
高岸不可測者亦徒見夫深林茂木清泉瑰石而已求
其人固不得彷彿而從之也蓋為之躊躇歎息而不能
去四川儒學提舉缺云於此有曰汪君者幾近之

修漢天師張氏正一法持戒嚴甚飲食起居之堅苦自

其徒有不能堪蜀大旱祈禱無所應吏民走以要汪君
君以其法致之雨立至大水又以要汪君雨止歲以
不害若夫疫癘鬼恠之撓吾民者得汪君指顧皆帖息
如常時汪君出道見者無男女老稚皆拜伏車下如見
神人自行中書省肅政廉訪司凡官府郡縣咸信尚焉
未始少為之屈也成都守實訥度地於城中之西偏與
前守共構室處之遠近之民吏軍將商賈送竹木瓦石
金幣米粟與百工操其技自獻者四面而至矣於是宮

廣若干畝制屋為殿者二一祠天帝一祠漢正一天師為堂者幾祠某神為圓庵及東西屋以居修真者而居汪君者曰草堂為屋若干間門廡厨湧庫廁悉具經始以延祐元年二月成於三年之八月總凡役者郡人徐慶源而汪君翛然若不與知者也既復命予以汪君事語玄教嗣師玄德真人吳公全節真人曰此吾龍虎山中學道弟子也西游青城十年矣未幾成都守臣上其事集賢院以聞有敕賜名曰正一宮正一者本其法所

師之號也汪君名集虛字太

闕

廣信人今守國人元帥

紐掄公之孫元帥自憲宗皇帝時以兵取蜀有大功前

守張氏名雋河中人嘗在宿衛玄德真人曰子本蜀人

又嘗使過其處宜為銘銘曰

維蜀之都金城靈關秦闢文林漢作休養自葛殷
完最唐閏世千百以安為常或伐而服或據斯取兵無
久搆旋按故堵壅繁蠹庵數丁剗除噓噦百年谷陵均
墟既撤而息迺見牙蘖承時嘉澤更長斯治神帝靈仁

惠肯顧依宰于燥淫疵癟勿威厥惟清靜克通袖志靡
祈弗應相我人士人士作宮敬報神師有儼有臨匪僭
匪私於皇天子視遠如邇郡奏朝聞夕出封璽曰咨遠
人孰保孰容苟相之道予曷弗從伊祝何秘于躬受福
嗟爾衆庶視此明勅毋邪爾思勿貳爾心物辨志定正
一是欽可以安泰可以長久名不虛造是用嘉爾凡我
蜀人帝力是知永歌萬年新宮是詩

開元宮碑

皇慶二年七月使召靈妙真常崇教真人王壽衍於杭
州以弟子張嗣顯從十月至闕賜見于嘉禧殿館諸大
崇真萬壽宮真人使嗣顯來言曰某所領開元宮其因
革具有始末惟不傳是懼請記之按舊志杭故有開元
宮唐開元中刺史陸彥恭用詔書所作乾符戊戌燬于
火後五十九年吳越文穆王復其舊其臣林鼎記之宋
景德丁未勅改景德觀後十六年有以私財修之者進
士陳戩記之然俱不復存嘉泰甲子寧宗以其潛邸為

今宮復賜名開元并祠闕伯命大洞法師張某主之宮在祕書省之左紹定辛卯燬于火又重作之廣以大宗正司故基賜田七十九頃度道士十四人以居大元至元十三年行中書省杭州即故祕書省為署二十八年大火省及宮俱燬省故隘卑不足稱大藩之容觀取開元地拓之出金助開元主者董君德時及今真人購故宋公主第以為宮公主親理宗女有司護作唯謹規制工伎甲於當時至是易其檐桷門陛榜署因加表飾設

貌位被服以象其天神帝仙人之屬隆隆然湛湛然真
神宮殊庭矣明年翰林學士承旨閻公復記之元貞二
年陳君天錫奉旨繼董君時晉王以真人藩府之舊請
以主宮事真人固辭大德八年始以宣命繼陳君奉被
璽書加護如故事初賜印視五品以重所領領之九年
外完垣舍內嚴臺殿凡宮之為制始備又封植其花石
竹樹疏導其池渠高梁跨雲曲館進風神魚靈鶴來泳
來止所以休寧其修真者尤邃密靚雅樂哉天人之君

乎曾城之內殆莫與加矣於是請謝宮事未幾俄賜號曰真人使者即其宮命之遂還理其宮不敢去及得見天子即具疏言聞道家以無為為宗古之言真人者閑邈矣今為其道者善傳上意達諸神明導況祉存著專一其事也惟大宗師大真人嗣師真人久侍中被寵遇有號名命數其貴視公卿侯伯而不與其憂責於玄教顯榮極矣夫名者實之賓泰甚則忌真人非遠臣所可得名臣敢固辭不敢稱真人得還山奉祠事以報聖朝

志願誠足矣天子聞而嘉之若曰為而不有真老子之道哉昔人言仙者非有求人主人主求之耳尚慈儉尊退讓以風示天下為國之禮則然延祐元年四月因改賜號曰弘文輔道粹德真人命學士為訓辭示褒寵刻銀為印視二品使盡護杭州諸宮觀仍治開元宮亦名璽顯以璽書而別為璽書給驛騎五命徧祠江南諸名山奉辭之日天子見之便殿賜坐留與語移時深稱上旨因顧侍臣曰予早知大宗師今年高德彌謹嗣而傳

之者予必貴之此其人尤宏廓用謙以為禮者乃字真人而命之曰眉容朕知老子所為道德經開物成務者也善學者人人可用世非獨道家書先命近臣以明示中外爾尚敬宣至意勿敢忘又賜寶冠金衣始稱真人服章焉於乎開元之為宮久矣繇真人深自謙抑為上所嘉顯其名益遂表著於天下宜有銘銘曰

於皇聖世治臻清靜惠宗道家受釐有祠内外相望靡不寵嘉煌煌我宮殿於東南神明之居在昔前王化家

作之中其國都何因何稽曰為開元廢維禎符禎符孔
明大開元疆神告不誣顧民弗省歲行六十既燬而墟
除而圖新爰得永宜天人合謀甲觀夙成帝子攸降巍
巍渠渠道貴因循不貴改作昔劬我舒迺象貴神赫如
有臨風馭電車大集于成在今真人克恭璽書恩言雅
文真人用謙為道光華自朝旋宮率職贊祠思用不渝
錫福予齡天子不有于民是敷維千萬年至於億世邈
哉永圖敢述聖德刻以貞石式章道樞

玉笥山清真宮碑

玉笥山清真宮在臨江之新淦其寶錄以為本名群玉山漢武帝受上清籙於此見有光如笥下之改今名而以上清名宮云元封五年武帝行巡南郡登潛天柱山出尋陽浮江過彭蠡所過祠名山大川今山在彭蠡上游數百里豈嘗至而史略之不然則郡國望幸者或繕其治處矣按圖其山起東南稍行而南為三峯名赤松漢武魏夫人三壇又西為覆箱峯特奇峻又北為北峯

中引小墮而下宮在宛宛中與前三峯相直上有石壇
九避秦人孔丘明等九人上昇處故曰送仙峯又東為
郁水坑其東南出與初起山相值兩山之趾犬牙交入
緣澗水取徑二十四曲折始出山外而中若環堵者矣
意者受寬而括約苟之所以得名者與其所祠神君曰
九天司命左曰洞天天王右曰洞天仙官蓋古之得道
者云又曰縣其三峯之崇高巖厲故以名其神云此近
是矣其地多奇卉靈藥又有丹井墨池壇洞之屬皆託

古仙神人以名之信乎非世俗所得有者每天高氣清
有聲出空中如衆樂並作莫知其名物然一時同在者
或聞或不聞及夜閒寂又如聞車馬金革之來若神物
有所効治者居民相傳畏忌遠其家數十里外獨學道
之徒居是宮耳宮之始末可知者梁天監中杜曇永與
其門人錢文詠來居蕭子雲以錢百萬助成之宮今有
石刻在宮中是曇永所撰上清宮碑文而文詠書然其
署官文字制作不合疑後人所重立有改易失真者唐

長慶中謝修通奉母隱此山寶錄所著也南唐時皮羽
南受知後主刻木為印使佩之以治宮事徐公錯為篆
上清宮額此最可傳信者矣宋宣和中勅改為清真宮
端平丙申主宮事者李希白故給事中大有之孫也郡
人重之為請于朝使度弟子得甲乙相次傳授乃得徐
紹禹魯道隆皆名家子又有道行法術為時所尊敬故
能大其宮而新之益入田租以給衆來者日至而宋亡
矣自是以來相繼治其宮者曰胡永年魯卿曾劉繼賢

曾季謙張高者涂弘道其方來則歐陽本一聟立仁其人也至元丙戌世祖皇帝召卿曾至京師咨問稱旨留之四年乃得還既而宮之屋日弊於是元貞丙申永年作法堂至大戊申鄉胄嵩者又作冲妙堂戊午季謙又作三清殿先後以其財來助者郡人胡復張日新臨川夏闕廬陵曾德和曾翼申曾如圭姑蘇周靜法也其後繼作日虔不懈而宮皆新成者矣三清殿成之明年聟立仁方從玄教嗣宗師以其事來告曰未百年而吾

宮新則昔之從事於此者多矣然自杜君以來姓名可考者寥寥數人耳則其泯而無聞者無文字金石之託也亦可自我之世無以示後人子幸為我銘予既聞而歎曰山川之形勢為豪傑所臨依衆庶所會通者歷歷可見然而忽然之間時往物異則感慨係之而荒閒寂寞之濱乃有斯人據泉石之極致以相傳長久如此乃為次第其說而勒之以銘銘曰

太秀之山群玉之府廓兮有容若苟將貯不鍵而固匪

索而盈合冲納和神憑虛生其神孔明維大司命參我
左右宰我衆正若瞻紫垣羅絡四周表衛中居旋制九
州文昌之宮泰階之上靈氣翕張孰執其象偉若降精
歸峯峙渟炳燎弗輕食于殊庭神君欲來泠風與俱樂
出太空合神于無朝陽熙熙夕顥肅肅孰其迎將孰其
往復精明粹融潛滋密充自然遂成闕不逢穆穆在

朝皞皞在野我宮恒新以詔來者

道園學古錄卷四十七

欽定四庫全書叢要卷一萬六千三百七十五

集部

道園學古錄卷四十八

方外藁四

元 虞集 撰

碑

崇壽觀碑

大茅山之下當華陽南洞之便門有崇壽觀者本晉洞天觀館主任敦故宅宋元嘉十一年路太后始建壇宇太始中盧陵太守孔嗣之重立以奉曲阿高士華文賢

齊建元二年勅句容王文清仍立而主之名崇元館武
帝以太子時至焉唐貞觀初勅改為崇元觀有太極元
年所樹碑石完而文泯可識者左拾遺孫處玄文揚幽
經書數字而已天寶七年李玄靜先生奉勅重修復民
百家備修葺寶歷三年主者有賀思寶則因器物銘識
而考見者也宋大中祥符七年勅賜今名大元至治二
年句曲外史張君嗣真始來主之顧瞻方壺近對南面
左峯疊玉右引大茅之支而回合焉定錄君嘆言大茅

山下有泉水近水口處可立靜舍陶隱居云近南大洞
口有好流水而多石出便平比有王文清居之則此觀
是矣乃嘆曰山中館宇自齊梁唐宋至于今代有增益
求諸晉人之舊惟此與玉晨許長史宅耳而吾所治乃
傾廢隘陋特甚豈不在我耶於是度材鳩工更後堂為
大元殿以復舊規象三茅君於中東為任華王學賀五
君祠西為陶隱居祠充前殿基為弘道壇自製銘其上
壇東為玄武祠西為廣惠祠後為文賢講堂而前為都

門門外浚古玉津池盡受大茅南面諸原之水循池西南得昭明太子讀書臺臺東有井曰福鄉井福鄉者因昭明道館名也出諸榛莽著文刻石覆之以亭而巖洞泉石之勝近在百步內者皆按圖表之可以觀覽泰定元年上清四十五代宗師劉君大彬朝京師授予始末備為之次第焉張君吳郡人名天雨更名嗣真字伯雨別號貞居年二十棄家入道徧游天台括蒼諸名山吳人周大靜先為許宗師弟子得楊許遺書張君從而以

為師悉受其說嘗從開元王君壽衍入朝被璽書賜驛
傳顯受教門擢任非其志也即自誓不希榮進因從三
茅之招追奉任君而下五君為文而告之願畢力茲字
所著外史山世集三卷碧巖玄會錄二卷又尋山志十
五卷考索極精博云烏乎自任君始居此餘數百年才
五人傳焉其自致于久遠者果何託也豈若後世各誘
門人系以私屬如家人父子者哉故寧希閑而有待今
張君無前代賜予之助徒草衣木食以營此而曠然思

與四方之士共為千載之期豈非豁落丈夫也哉予故與君為方外友竒其能先予遠舉也故系之以詩曰
大茅南垂元氣積陰開闔扉陽洞闢曲穴流泉保靈宅
任君來餌黃赤石天一名錫太元冊曲阿受養良有擇
構宮方嚴自王伯清蹕臨止靈響格虛林森爽化赫奕
福鄉帝子發甘液不食何年喪遺覽白雲缺

開元全盛煩百役持節旁午致纁璧爾來蕭條世代隔
缺

文土漫畫誰其啓之規古昔句曲外史美冠鳥

研書千卷視貞白天真景隨玄系繹玉室金堂萬無斁

仙都山新作玉虛宮碑

縉雲縣仙都山者道家書以為祈僊總真洞天相傳黃帝曾於此煉丹而仙去唐天寶中賜號仙都山祠黃帝禁樵獵三百里李陽冰所為題黃帝祠宇者也宋治平三年賜名玉虛宮天禧中連年勅修醮宣和三年燬于寇道士游大成作之開慶中郡守安劉相陰陽更定面勢命道士陳觀定改作之內附國朝主宮事者四方之

人皆得為之而宮日廢道士趙嗣祺世居縉雲受業茲
山去而學仙武夷山數年後入京師朝中貴人喜之延
祐元年欽奉聖旨主領宮事始重新之三年刻銅印授
之視五品五年受宣命住持兼領本路諸宮觀嗣漢三
三十九代天師及玄教大宗師請以宮中師弟子甲乙
相次主其宮事聞有旨從之泰定二年也嗣祺遂承詔
徧祀東南名山歸主建康玄妙觀得謁今上皇帝于潛
邸至順二年來見因求歸仙都不獲請有旨更賜號曰

教門真士玄明通道虛一先生乃來告曰仙都宮成未有記今既未克歸懼因循無以示久遠幸勒文表之乃為著銘曰

縉雲之虛有峻其高旁無引緣上干雲霄軒后神明去世遂遼祠宇在焉冲融消搖微音出空豈其下邀有宮有廬有壇有時大光昭宣百靈萃止疵癟不作錫我繁祉室有壽考孫曾婦子不知不識明粢甘醴維昔軒后廣成是師千二百歲而身不衰究觀緒言澹乎無為以

修其身民用雍熙請以告民萬年如斯

勅封顯祐廟碑

至順二年夏江西行省以文書白于朝曰吉安守臣言其所統吉水州中鵠鄉有神廟食于石龕之里者相傳神姓劉氏諱煥蓋長沙定王之裔云舊志以為隋時始有廟至唐而益大歷五代及宋靈異甚著建炎初金兵蹂江南隆祐太后入贛避之舟行為石所礙有巨人翼其舟以出於險后物色之則神良是也遣人祠謝之自

是百數十年之間歲或旱禱之則必有雲起其東以為
雨有蝗禱之蝗不至其旁近有群盜犯其境禱之賊恍
惚有所見而散去當是時州固縣也而郡守之禱之也
必具官位姓名謹書祝辭于版而致敬焉勅賜其廟曰
孚應廟又封其神曰順惠侯蓋當時之制神靈之有功
於民者有司覈實其事以聞始賜廟額又有功則封之
以王其號自二字以上累封至八字極矣自入國朝來
凡水旱疾疫盜賊無有禱而弗應者而神封猶仍前代

之舊非闕歟聖朝懷柔百神德意至渥詔書每下則有
司長吏必謹具牲幣奉祠境內諸神之在祀典者是以
石礪之祭歲月相望也請更大其封以答神庥而以慰
民人敢以為告於是中書下其事禮部禮部移書太常
而博士議曰宜因其舊而更其廟號曰顯佑廟加封神
曰昭烈王吉水州道士某法師提點某觀事劉學仙來
請書其事而刻諸石且曰為神求封者州民李從大也
奉成命以歸報神者李思用某也新王之廟而大之者

某某也學仙嘗遊西北諸邊為宗室諸侯王客多見神異之事至京師達方言於好事者甚多有之若至額齊訥路戢古山北見有烹羔桐酪祠龍湫數皮而沈之祝曰神為我鞣而治之為期日而去至期復祠之則得成革矣若有鬼工然不可測也其地往往有人在京師者或從質學仙言則信蓋其人習以為常而又不能言諸人耳志怪若此者猶因學仙之言而傳況石礪之事書而識之何斬焉學仙好文學能為歌詩故又為享神之

辭曰

坎坎伐鼓石礲之下注醪盈觴解牲在俎神其來思胥
樂于舞我東曰瞻雲來如雨誰其從之昆弟如倡神固
王孫長沙伊祖惠我孔仁亦厲而武是耶非耶來即于
所神之享我自我祖父昔侯今王天子之祜裳衣有章
丹楹朱戶肅肅孔容孰敢予侮驅我癟鬼去我蟲鼠豐
我大田寧我屋宇爾妥我依至于終古

銘

佛國普安大禪師塔銘

至順二年夏上都大龍光華嚴禪寺住持僧法琳言昔在憲宗皇帝癸丑之歲世祖皇帝嘗命我開山溫公統釋氏於中原後五年丙辰之歲始城上都又三年戊午之歲作大龍光華嚴寺寺於城東北隅溫公主之溫去世而少林雪庭裕公主之裕公去世二十年竹齋誼公屏岩顥公雲松微公至於我先師筠軒壽公六世矣在壽公之時英宗皇帝念茲寺為世祖所築作而新之加

廣大焉命壽公為司徒以重其事壽公以為溫公昔事世祖豪卓瑰異有足稱者宜表見於茲未及有所為而歿蓋自溫公至于今八十年歲月滋久恐遂湮沒誠願伐石紀事以成先司徒之志而不敢自專也乃七月二十日上在上都清暑於洪禧殿之便坐侍臣有群玉內司亞尉阿爾斯蘭布哈以琳之言聞且以臣某侍書奎章閣下在從官中請使屬文以賜之勅曰可明日阿爾斯蘭布哈傳勅至臣所臣從琳得溫公事狀云師諱至

溫字其玉一號奎一邢州郝氏子也幼聰敏異常兒年六歲其母携之至龐馬村見寂照和尚於淨土院寂照曰汝其為釋氏乎師心許之會寂照避亂去隱遼西乃禮寂照弟子辨庵訥而祝髮焉無還富公主淨土莊衆甚嚴師不以為忤庚寅之歲無還開法萬壽師與十僧同往佐之萬松某公以青州辨公宗旨開示法要門庭高廣四方尊之師見萬松始以才氣過人稍不容於衆然而傳記多聞論辨無礙百家諸子之言多所涉獵又

善草書有顛素之遺法年才十有五為萬松侍者凡萬
松偈頌法語一聞輒了之遂得法焉常以侍者代應對
談鋒迅利不可犯時人已深期之故太保劉文貞公長
師一歲少時相好也劉公厭世故思學道師勸之為僧
同參西京寶勝明公既而為世祖知遇侍帷幄為謀臣
薦師可大用得召見與語大悅將授以官弗受曰天下
佛法流通臣僧之願富貴非所望也留王庭多有贊益
居三歲遣還出賜金資日用不計其費時憲宗命海雲

主釋教詔天下作資戒會師持旨宣布中外而輔成之
世祖征雲南還劉公請承制錫師號曰佛國普安大禪
師總攝關西五路河南南京等路太原府路邢洛磁懷
孟等州僧尼之事刻印以賜師銳意衛教凡僧之田廬
見侵於豪富及他教者皆力歸之馳馳四出周於所履
必獲其志乃已自其門人或勸之少憩弗懈也五臺山
清涼勝會凡百晝夜既得請興廢於兵火數十年之後
師假貸以經始既而四方雲集響應金穀之施與瓜果

之供養反有過承平之時而山之真容等院因以完實
而新美若此者特其材略之緒餘也師既開山龍光又
作大都之資聖真定之安國汾陽之開化彰德之光天
固安之興化三河之蓮宮餘不能盡紀憲宗末年僧道
士有諍各為違言以相危上命聚訟於和林剖決真偽
師從少林諸師辨之道士義墮難須髮者十七人道宮
之復為僧者以千百計中統建元釋教大盛僧衆賴之
甚思師之功焉而師遂納印辭職每歲官賜金修寺之

外世味泊如也至元丁卯五月二十二日以疾終於桓
州之天官寺西向右脇而化當暑儀形如生更有異香
三日火浴之心舌才不壞衆庶培其地深數尺猶得舍
利云壽五十一僧臘四十師有草書詩文傳於世可以
觀其人焉其老也將有所論撰不及而歿臣聞世祖皇
帝聖度如天善馭豪傑自在潛邸至於混一海內天下
之人材小大畢至以足其任使故其功業之盛巍巍然
赫赫然三代而下帝王未有或之及也浮圖氏以寂滅

為宗而才器文辨如溫公者亦豈常人之流哉敢叙而表之以見夫興王之運其人如此銘曰

維昔世皇始理開平作其潛藩有宮有城顧瞻東隅泉甘土厚蜿蜒來止屬垣負阜命建仁祠龍光是名權輿來尸僧有豪英氣如虹霓辨若風雨縱橫凌厲莫敢予侮世皇有為羣策是稽名見從容出其端倪善其利器俾反初服報德不回屹若孤鵠林林釋徒稟教以居孰為紛更入主出奴天子有命存完去駁我馳我驅立折

其角燕趙之間至於陝關我田我廬來歸匪艱世皇御
極民用寧一而釋之門既振既息時龍光師燕居弗馳
散其緒餘為書為詩詩揚宗風書縱逸趣沛將有述棄
而遽去維時名僧至於公卿有誄有辭失之若驚垂八
十年英標如在誰知表之嗣者七代義舉有聞天子喜
之史臣屬辭以係遐思

智覺禪師塔銘

天目之山有獅子巖高峯妙禪師居之設死闌以辨決

參學之士望崖而退者或衆矣得一人曰本公是為中
峰和尚師生有異徵為童兒嬉戲必為佛事斂入鄉校
尋棄去稍長閱經教然指臂求佛甚切晝夜彌厲困則
首觸柱以自儆期必得乃已及入死闕密受心要久之
誦金剛經至荷擔如來阿耨多羅三藐三菩提處恍然
開悟自是說法示人縱橫該貫如千江一源奔注放溢
莫之能禦從容自在若不經思累千百言應問無礙隨
其根器廣為策勵推以為大辨焉縉素及門自以為有

得即所聞受傳錄模印行於四方所謂法語書疏題唱
之屬不可勝計又有書五篇曰破胎息論妄傳曰闡信
心明義解曰擬寒山詩曰辨七徵心處曰說如幻法名
曰一花五葉集虛谷凌禪師於師為尊屬見而歎曰此
佛祖向上事非下根小器所可識也仁宗皇帝聞而聘
之不至製金欄袈裟賜之曰佛慈圓照廣慧禪師賜獅
子院名曰正覺禪寺英宗皇帝亦封香製衣即所居而
修敬焉駙馬太尉濬王王竟使人從師問法意以為未

足請於上親往見之既見構亭巖前曰真際表得法也
三藏法師沙津愛護持必納雅實理遊方時常從師參
詰及事三朝每為上道之翰林承旨吳興趙公孟頫每
受師書必焚香望拜與師書必稱弟子行省丞相拜布
哈行宣政院使張閣諸達官尤加愛敬每徑山虛席必
以待師師固不受迺已轉運使瞿霆發作大覺寺以奉
師亦不受師踰浙絕江渡淮濟汴至浮舟以居而避去
之從之者如雲北極龍漠東涉三韓西域南詔之人遠

出萬里之外莫不至焉所至結庵一名幻住信施金幣
重寶交至一視之貌如也師相貌魁碩見者稱嘆皆畫
象事之南詔人有奉其象者夜有神光燭天其土感悅
遂篤信禪宗云時人為之語曰師乘大悲願力為法檀
度觀時識宜隨機應物多諸方便如摩尼珠無有定色
為未證得謂證得者我說無悟由為求名聞利養者韜
晦巖谷為毀犯律儀者演毗尼法為妄認法塵以資狂
解者導以正悟為圓機者直示向上師皆以身先之不

事夫空言也而師方自以為文字失於學問參究關於悟明尋常好事者所稱益報緣之偶然爾翩然為退休之計蓋師之高邁過人遠甚而謙抑如此所以為不可及也師諱明本宋景定癸亥歲生錢塘之新城姓孫氏年六十一僧臘三十七大元至治癸亥八月十五日化於其山東岡之草庵有訣別書偈誠門人勿行世俗禮而門人及遠近來弔者哭師甚哀聲動山谷遂奉全身葬以西岡之上而塔焉後七年為天歷二年正月甲子

天子使翰林學士承旨領國子監事額琳特穆爾召臣
集至便殿命之若曰其賜師號與塔名而汝為之銘俾
其門人單檀密即禮刻之山中臣某再拜而言曰國家
崇尚佛乘至矣而禪宗惟東南為盛然專席稱師者
豈無其人哉至於四十餘年之間浩然說法其言語
文字汪洋廣博為遠近信向未有若師之盛者也請
製智覺禪師法雲塔之銘曰

巍巍楞伽上極無際大雄善喻著無上義達摩之東憂

言多窮獨此不遺曰心之宗是故妙師高蹈天目右海
左江以表遐矚師子巖巖置死為闢孰當吾鋒有造無
還惟幻住叟登中據最示則絕學無倚無外千偈闡翻
夫豈好言昏蒙鉗深抉提孔難如彼淫疾勝邪並受有
大醫王為出一手砭炳塗摩搗嚼鍊烹紛然百為因病
以生疾除醫已言亦如是得本不迷何有一字悲願深
宏智覺所敦受職度人鬱乎法雲法雲彌天有蔭斯普
協于皇風永填終古

大辨禪師寶華塔銘

達摩傳佛心法於中夏臨濟一宗最為得人七傳為楊
岐白雲五祖圓悟真所謂不立一法根源直截者灼有
端緒不可誣也悟之傳有虎丘隆大慧果卓然植其宗
風於故宋南渡之初門戶嚴峻波瀾浩蕩自朝廷大臣
縉紳先生莫不委心焉道不同者猶徘徊稱嘆以為不
可及東南禪門之盛未有及於斯者而隆之傳應庵華
密庵傑破庵先無範演化之宏與慧相望至於雪巖欽

公五世矣當宋之亡宗門尊宿漸向寂寥巖公毅然自任其導引甚方便而鑑可極巖絕得法於其門者十數人徧布江湖之間各以所至坐大道場宣闡法要在大江之西者則虛谷陵海印如父子兄弟相為倡和以發明斯事諸方尊信之嗣巖集雲之席者則吾陵公禪師而已師年十九落髮於東陽資壽院受具足戒即謁虛舟遠於雙林又依東叟頴於淨慈掌內記石林輩至淨慈師亦侍者兼外記徑山雲峯高尤敬之諸分座說法凜

凜諸老之餘風得師相與議論激昂發明咸器重之爭
以得師為重而師曾不以此自足迺見巖公于杭遇諸
塗巖舉黃龍見慈明事問之巖印其額達及歸大仰而
師方遊金山遣書招之甫至遽請為第一座一日室中
巖舉臨濟在黃蘖三度喫六十拄杖因忍向大愚肋下
築拳師云鈍置殺人巖便打師拂袖出至元丙戌歲也
是冬巖將示滅拍師肩曰吾以此擔累汝師曰終不向
這裏活埋却未幾巖果化去衆以為佛祖向上一機微

師莫能開示力請師繼其席師勉循焉垂三語以驗來學曰三乘十二分教拈向一邊蝦蟆曰裏道將一句來說狗子聞柱聲因甚咬破庫堂前露柱曰獺徑橋吞却集雲峯是第幾機答者罕契其意一坐三十夏四方學者奔湊規範森嚴有誘掖而無假借裨販之流或欲得一言以自表深謙重施以求之卒不可得師為文章清麗高古夐絕塵俗西江之老於文學者往往故國之遺傲睨一世及見師嗒然自失者多矣而少俊之才由師

指示而英英脫穎於翰墨之場者亦間有之然則況於
為其學者乎寺嘗有水火寇攘之厄師隨葺隨更若不
經意施者雲集既敏於成又加廣大有非人力所能者
歲飢師每食必與衆僧共之方丈之外無私炷爨嘗與
客語過齋時及夜飢不自勝侍者請取勺粟鬻水以為
飲師不可曰常住物非住持人所得私其清苦如此或
出山至城府官民縕白迎拜道左親慕愛敬始終如一
無或間然杭之徑山江左望刹之最公論願師一至其處

久矣延祐丙辰行省稟朝旨迎師居之袁人士號慕遮挽或訴有司留之不可扁舟所經望塵瞻禮以祈法施及至徑山開堂之日萬口翕然以為不巍妙喜於二百年之外者百廢具舉四衆歸心嘗與隣峯受供長者之家食器列皆白金也施者奉齋竟請從者并几器收之師目從者只取餘齋而已及與隣峯聯舟還從者微哂曰師誤隣峯虛行矣問故從者浙人長者重施以為常師不受他師亦不取師嘆曰汝奉佛遺教固為是見解

耶此與瓦礫何殊而生計度心貴人達官舉家奉施拜
禮師不為動亦不加傲識者稱之蓋住山七年而歿世
祖皇帝時嘗召見說法稱旨賜號佛鑑禪師大德中新
作大仰山太平興國禪寺事聞成宗皇帝嘉之勅翰林
學士承旨程鉅夫製文勒石加賜大圓之號其來徑山
也仁宗皇帝又加號曰慧照至治壬戌四月十二日手
書囑付時官外護宗教戒敕弟子說偈示寂于不動軒
其徒奉全身瘞諸西峯昌浦田師諱希陵字西白姓何

氏婺之義烏人也世壽七十六僧臘五十七有瀑岩集及語錄偈頌凡若干卷行于世昌浦田者故給事中郎公簡歸隱故處而其塔癡絕冲照堂一荆叟珏之次初師在衆中有兩蛇常於檻外朝之仰山古有二龍龍至今靈異或曰二蛇即龍云無準塔前有岩桂樹常以歲三月準示涅槃日開數花及師主山之歲花乃盈樹師平生主二大山幾四十年其因緣豈偶然哉泰定四年徑山首座子良徒步乞食來京師求塔銘於某久未克

為也良堅忍寒苦者數年不懈天歷二年四月二十一
日翰林學士承旨光祿大夫額琳特穆爾奎章閣大學
士光祿大夫呼圖克都哩黑色奎章閣學士叅書文林郎
柯九思侍便殿具言師之道行良之志與文之所以未
克者有旨賜號曰大辨禪師塔曰寶華之塔而命臣集
為文臣集頓首稽首而著銘曰

先佛既遠後佛未逢如是中間妙義非空璇璫岩瀑春
雨時至珠瓊散落無有量計天上人間海藏龍宮各得

少分不昧心宗而大辨師宴坐一室翠藤彌天竹樹綿密古雪在山夐絕人蹤畧示三闊一綫之通我觀華嚴
儒童本智帝綱交參珠光無二大雄之宮列城潭潭雷
音不興羣蒙共酣集雲之峯雙徑之塢樹大法幢鳴大
法鼓神龍來聽天雨寶華諸天唱言辨才不夸聖皇御
世尊敬法寶千劫信願億載之保應期而生師在江南
四聖具瞻如見優曇巍巍靈山儼然高會其來非來其
去非逝無垢者月大慈者雲覆照無窮贊以彌文

道園學古錄卷四十八

謹案卷四十七第二頁後五行珍且爾舊作真吃

刺今改 後六行諤勒哲依達實舊作阿刺者

怛斯今改 五頁前四行托雲巴爾舊作唐元


保今改 十四頁前六行實訥舊作陝攝今改

十五頁前二行紐掄舊作紐林今改

卷四十八第七頁前二行額齊訥舊作亦集乃今

改 前三行鼈古舊作蹇古今改





總校官庶吉士臣張能照

校對官庶吉士臣曹錫齡

謄錄監生臣勵守訓